

**Umno Punyai Ramuan Mencukupi Untuk Rampas Kembali Selangor - Muhyiddin Bernama**  
**15 September, 2012**

KUALA LUMPUR, 15 Sept (Bernama) -- Timbalan Perdana Menteri Tan Sri Muhyiddin Yassin yakin pelbagai isu yang tidak mampu diselesaikan oleh kerajaan pembangkang di Selangor mampu menjadi ramuan mencukupi bagi Barisan Nasional (BN) merampas kembali negeri itu pada pilihan raya umum ke-13.

Muhyiddin yang juga Timbalan Presiden Umno berkata pelbagai masalah seperti isu air yang masih tidak berkesudahan sehingga ke hari ini, selain isu penyelewengan Talam Corporation dan pasir di negeri berkenaan menunjukkan kepincangan dan ketidakupayaan pembangkang memerintah negeri itu.

"Dan kalau kita lihat daripada apa isu dan apa permasalahan yang sudah timbul di negeri Selangor ini, sudah banyak sekali yang telahpun saya kira menyentuh setiap perasaan rakyat Selangor dan juga rakyat Malaysia, apa yang telah dan sedang berlaku," katanya semasa merasmikan persidangan perwakilan Umno Bahagian Selayang di sini, hari ini.

Malahan, katanya menerusi beberapa sesi lawatan turun padang sebelum ini, beliau yakin sudah wujud petanda gelombang rakyat yang mahukan kerajaan BN kembali memerintah Selangor.

"Saya tahu, saya turun banyak tempat, banyak yang salam-salam saya... mereka bertanya 'Tan Sri bila pilihan raya. Dah tak tahan dah Tan Sri kami nak sokong nak menangkan BN dalam pilihan raya'," kata Muhyiddin dan menambah bahawa trend yang sama juga berlaku di Kedah.

Namun begitu, beliau berkata anggota Umno dan BN perlu bersedia dari sekarang kerana pilihan raya umum boleh diadakan pada bila-bila masa dan segala permasalahan dalaman, terutamanya perbuatan mensabotaj parti perlu dielakkan.

"Ini bukan satu perkara kecil, nak kembalikan kuasa, bukan sekadar kuasa tetapi kuasa kerana maruah. Dengan kuasa dapat membela bangsa, agama dan negara, memajukan masyarakat, memakmurkan masyarakat, soal pokok kembali kepada kita, 'Are we ready' (Adakah kita bersedia),"katanya.

Selain itu, Muhyiddin berkata jentera pilihan raya BN juga perlu memberi tumpuan kepada pusat daerah mengundi (PDM), sebagai tempat di mana parti dapat terlibat secara langsung dengan pemilih di kawasan yang berkenaan.

"Kita tak nak apa yang berlaku di Kelantan pada pilihan raya umum 2004 berulang kembali. Kita kalah di Dewan Undangan Negeri, kalah dengan dua undi tetapi dengan sebab itu kita gagal merampas kembali negeri Kelantan," katanya yang turut melahirkan kekecewaan kerana hanya 40 peratus daripada PDM di seluruh negeri didapati telah bersedia menghadapi pilihan raya.

Justeru, beliau mahu semua anggota parti berusaha 10 kali ganda lebih kuat bagi memastikan negeri-negeri yang ditadbir pembangkang dapat dirampas kembali pada pilihan raya umum akan datang.

Sementara itu, Muhyiddin mengulangi pendirian kerajaan untuk meneruskan pembinaan projek Loji Rawatan Air Langat 2 (Langat 2) walaupun mendapat tentangan daripada kerajaan Selangor.

Beliau berkata ia merupakan tekad dan azam kerajaan pusat demi kebaikan negeri dan rakyat secara keseluruhan kerana jika projek itu tidak dilaksanakan, krisis air akan berlaku bukan sahaja di Selangor tetapi juga di Putrajaya dan Kuala Lumpur.

Muhyiddin turut sekali lagi mempersoalkan tindakan Menteri Besar Selangor, Tan Sri Abdul Khalid Ibrahim yang masih bertegas tidak mahu projek itu dilaksanakan, walaupun pakar dari dalam dan luar negara telah mengesahkan situasi kira-kira 37 loji rawatan air sedia ada di negeri berkenaan yang hampir tenat.

"Kalau tak diselesaikan segera, kalau tak dibenarkan kerajaan pusat teruskan projek Langat 2 mungkin satu krisis air yang besar akan berlaku, bukan sahaja menimpa Selangor tetapi kawasan Putrajaya dan Kuala Lumpur di mana jumlah penduduknya mungkin lima atau enam juta atau lebih daripada itu," katanya.

Kesan daripada penangguhan projek Langat 2, Muhyiddin berkata beliau difahamkan terdapat kira-kira 200 projek di Selangor terpaksa ditangguhkan kerana tidak diberikan 'Certificate of Fitness (COF)' oleh kerajaan negeri.

"Kerana dikatakan kalau dikeluarkan (COF) maka kerajaan negeri bertanggungjawab mengeluarkan utiliti iaitu bekalan air bersih, jadi tak mampu dibuat maka tak keluar la sijilnya, lihat bagaimana kerugian besar kepada negeri dan rakyat Selangor," katanya.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=694917>